

SL(6)364 – Rheoliadau Sgil-gynhyrchion Anifeiliaid, Pasportau Anifeiliaid Anwes ac Iechyd Anifeiliaid (Ffioedd) (Cymru) (Diwygio) 2023

Cefndir a diben

Mae'r Rheoliadau hyn yn diwygio Rheoliadau Sgil-gynhyrchion Anifeiliaid a Phasportau Anifeiliaid Anwes (Ffioedd) (Cymru) 2018 ("y Rheoliadau Sgil-gynhyrchion Anifeiliaid") a Rheoliadau Iechyd Anifeiliaid (Ffioedd Amrywiol) (Cymru) 2018 ("y Rheoliadau Iechyd Anifeiliaid") (gyda'i gilydd, "Rheoliadau 2018"). Mae'r diwygiadau yn addasu'r ffioedd sy'n daladwy i Weinidogion Cymru o dan Reoliadau 2018 am wasanaethau a ddarperir ym maes iechyd anifeiliaid gan yr Asiantaeth Iechyd Anifeiliaid a Phlanhigion i adlewyrchu costau llawn y gwasanaethau hynny.

Mae rheoliad 2(4) yn diwygio'r Rheoliadau Sgil-gynhyrchion Anifeiliaid i ddirymu'r ffioedd sy'n daladwy i Weinidogion Cymru am ddogfennau adnabod gwag a gwasanaethau a gyflawnir mewn perthynas â darparu dogfennau adnabod pasbort anifeiliaid anwes.

Mae rheoliad 2(5) yn diwygio'r Rheoliadau Sgil-gynhyrchion Anifeiliaid i addasu'r ffioedd sy'n daladwy i Weinidogion Cymru am wasanaethau a gyflawnir mewn perthynas â sgil-gynhyrchion anifeiliaid. Mae'r ffioedd, pan gynyddir hwy, yn cynyddu yn ôl y codiad cyfartalog canolig o 41% o'r ffioedd presennol mewn dau gam: mae'r cynnydd cyntaf yn gymwys ar 5 Gorffennaf 2023 neu ar ôl hynny, a'r ail gynydd yn gymwys ar 1 Gorffennaf 2024 neu ar ôl hynny.

Mae rheoliad 3(6) yn diwygio'r Rheoliadau Iechyd Anifeiliaid i addasu'r ffioedd sy'n daladwy i Weinidogion Cymru am wasanaethau a gyflawnir mewn perthynas â rheolaethau salmonella. Mae'r ffioedd, pan gynyddir hwy, yn cynyddu yn ôl y codiad cyfartalog canolig o 53% o'r ffioedd presennol mewn dau gam: mae'r cynnydd cyntaf yn gymwys ar 5 Gorffennaf 2023 neu ar ôl hynny, a'r ail gynydd yn gymwys ar 1 Gorffennaf 2024 neu ar ôl hynny.

Mae rheoliad 3(7) yn diwygio'r Rheoliadau Iechyd Anifeiliaid i addasu'r ffioedd sy'n daladwy i Weinidogion Cymru am wasanaethau a gyflawnir mewn perthynas â'r cynllun iechyd dofednod. Cynyddir y ffioedd yn ôl y codiad cyfartalog canolig o 21% o'r ffioedd presennol. Mae rheoliad 3(7)(a) yn cynyddu ffioedd cynllun iechyd dofednod penodol mewn dau gam: mae'r cynnydd cyntaf yn gymwys ar 5 Gorffennaf 2023 neu ar ôl hynny, ac mae'r ail gynydd yn gymwys ar 1 Gorffennaf 2024 neu ar ôl hynny. Mae rheoliad 3(7)(b) yn cynyddu gweddill y ffioedd cynllun iechyd dofednod penodedig mewn un cam, ac mae'r cynnydd yn gymwys ar 5 Gorffennaf 2023 neu ar ôl hynny.

Mae rheoliad 3(8) i 3(10) yn diwygio'r Rheoliadau Iechyd Anifeiliaid i addasu'r ffioedd sy'n daladwy i Weinidogion Cymru am wasanaethau a gyflawnir mewn perthynas â rheolaethau bridio artiffisial. Mae'r ffioedd yn cynyddu yn ôl y codiad cyfartalog canolig o 65% o'r ffioedd



presennol mewn dau gam: mae'r cynnydd cyntaf yn gymwys ar 5 Gorffennaf 2023 neu ar ôl hynny, a'r ail gynydd yn gymwys ar 1 Gorffennaf 2024 neu ar ôl hynny.

Mae rheoliad 3(11) yn diwygio'r Rheoliadau Iechyd Anifeiliaid i addasu'r ffioedd sy'n daladwy i Weinidogion Cymru am wasanaethau a gyflawnir mewn perthynas â safleoedd rheoli ar y ffin. Cynyddir y ffioedd yn ôl y codiad cyfartalog canolig o 34% o'r ffioedd presennol mewn un cam, ac mae'r cynnydd yn gymwys ar 5 Gorffennaf 2023 neu ar ôl hynny.

Mae'r Rheoliadau hyn hefyd yn gwneud diwygiadau canlyniadol pellach i Reoliadau 2018.

Gweithdrefn

Cadarnhaol drafft

Mae Gweinidogion Cymru wedi gosod fersiwn ddrafft o'r Rheoliadau gerbron y Senedd. Ni all Gweinidogion Cymru wneud y Rheoliadau oni bai bod y Senedd yn cymeradwyo'r Rheoliadau drafft.

Materion technegol: craffu

Nodir y pum pwynt a ganlyn i gyflwyno adroddiad arnynt o dan Reol Sefydlog 21.2 mewn perthynas â'r offeryn hwn.

1. Rheol Sefydlog 21.2(v) – bod angen eglurhad pellach ynglŷn â'i ffurf neu ei ystyr am unrhyw reswm penodol.

Mae rheoliad 3(2)(a) yn cyflwyno diwygiad i'r diffiniad o "border inspection post" yn y Rheoliadau Iechyd Anifeiliaid. O ganlyniad i'r diwygio hwn, yn y testun Cymraeg, ni fydd y diffiniad newydd o "safle rheoli ar y ffin" bellach yn ymddangos yn y lle cywir yn nhrefn yr wyddor yn rheoliad 2 o'r Rheoliadau Iechyd Anifeiliaid.

2. Rheol Sefydlog 21.2(vi) – ei bod yn ymddangos bod y drafft yn ddiffygiol neu ei fod yn methu â bodloni gofynion statudol

Yn y rhaglith, ar ddiwedd y paragraff cyntaf ar dudalen 3, diffinnir "Deddf Iechyd a Lles Anifeiliaid 1984" fel "Deddf 1984", ond ni ddefnyddir y diffiniad yn unman arall yn y Rheoliadau.

3. Rheol Sefydlog 21.2(vi) – ei bod yn ymddangos bod y drafft yn ddiffygiol neu ei fod yn methu â bodloni gofynion statudol

Mae Rheoliad 2(5)(a) a (b)(iii) yn disodli colofnau 2 a 3 newydd yn Nhablau 1 a 2 yn yr Atodlen i'r Rheoliadau Sgil-gynhyrchion Anifeiliaid. Roedd colofnau gwreiddiol 2 a 3 yn cynnwys "Colofn 2" a "Cholofn 3" ar ben y colofnau yn y rhes gyntaf, ond nid ydynt wedi'u cynnwys yn y colofnau 2 a 3 newydd. Dylid nodi hefyd bod y colofnau newydd, fel y'u mewnosodwyd gan y Rheoliadau hyn, wedi'u fformatio'n wahanol i'r Tablau gwreiddiol a'r colofnau 1 gwreiddiol, sy'n aros. Mae'r colofnau newydd wedi'u gwahanu gan linellau tra nad yw'r Tablau gwreiddiol yn cynnwys llinellau o'r fath.



4. Rheol Sefydlog 21.2(vi) – ei bod yn ymddangos bod y drafft yn ddiffygiol neu ei fod yn methu â bodloni gofynion statudol

Mae rheoliad 3(8)(a)(iii)(aa) yn diwygio'r Tabl yn Atodlen 3 i'r Rheoliadau Iechyd Anifeiliaid. Yn y testun Saesneg, mae'r geiriau "an EC" yn ymddangos ddwywaith yn chweched rhes o Golofn 1, felly nid yw'r disgrifiad yn rheoliad 3(8)(a)(iii)(aa) yn caniatáu ar gyfer gwahaniaethu rhwng y ddau achos, heb gynnwys testun ychwanegol.

5. Rheol Sefydlog 21.2(vi) – ei bod yn ymddangos bod y drafft yn ddiffygiol neu ei fod yn methu â bodloni gofynion statudol

Mae rheoliad 3(11)(c) yn diwygio Tabl 2 yn Atodlen 6 i'r Rheoliadau Iechyd Anifeiliaid. Nid yw nodyn tabl (2) yn rhan o Golofn 2, mae'n nodyn ar gyfer Tabl 2 yn ei gyfanrwydd, felly ni ddylai'r nodyn hwn fod wedi'i gynnwys yn yr amnewidiad ar gyfer Colofn 2. Efallai y byddai wedi bod yn fwy priodol diwygio nodyn tabl (2) mewn darpariaeth ar wahân. Mae'r atalnodi hefyd yn anghywir gan fod y dyfynodau terfynol yn ymddangos ar ôl geiriau olaf Colofn 2, sy'n awgrymu mai dim ond y testun yng Ngholofn 2 sy'n cael ei ddiwygio, ac nid oes atalnodi ar gyfer nodyn (2) y tabl newydd.

Rhinweddau: craffu

Nodir y pedwar pwynt a ganlyn i gyflwyno adroddiad arnynt o dan Reol Sefydlog 21.3 mewn perthynas â'r offeryn hwn.

6. Rheol Sefydlog 21.3(i) – ei fod yn codi tâl ar Gronfa Gyfunol Cymru neu ei fod yn cynnwys darpariaethau sy'n ei gwneud yn ofynnol i daliadau gael eu gwneud i'r Gronfa honno neu i unrhyw ran o'r llywodraeth neu i unrhyw awdurdod lleol neu gyhoeddus yn gydnabyddiaeth am unrhyw drwydded neu gydsyniad neu am unrhyw wasanaethau sydd i'w rhoi, neu ei fod yn rhagnodi swm unrhyw dâl neu daliad o'r fath.

Mae'r Rheoliadau yn gwneud addasiadau i'r ffioedd sy'n daladwy i Weinidogion Cymru mewn perthynas â gwasanaethau a ddarperir gan yr Asiantaeth Iechyd Anifeiliaid ac Iechyd Planhigion, o dan Reoliadau 2018.

7. Rheol Sefydlog 21.3(ii) – ei fod o bwysigrwydd gwleidyddol neu gyfreithiol neu ei fod yn codi materion polisi cyhoeddus sy'n debyg o fod o ddiddordeb i'r Senedd.

Yn y rhaglith, dyfynnir adran 10 o Ddeddf Iechyd a Lles Anifeiliaid 1984 fel un o'r pwerau galluogi. Mae'r pwerau yn adran 10 yn amrywio, felly byddai manylu ar yr is-adrannau perthnasol yn rhoi gwell cymorth i'r darlennydd. Er enghraifft, mae'r Rheoliadau Iechyd Anifeiliaid yn nodi adran 10(1) a (3)(c) o Ddeddf Iechyd a Lles Anifeiliaid 1984.



8. Rheol Sefydlog 21.3(ii) – ei fod o bwysigrwydd gwleidyddol neu gyfreithiol neu ei fod yn codi materion polisi cyhoeddus sy'n debyg o fod o ddiddordeb i'r Senedd.

Mae rhaglith y Rheoliadau yn datgan eu bod yn ddarostyngedig i'r weithdrefn gadarnhaol ddrafft yn unol â pharagraff 1(8) o Atodlen 7 i Ddeddf yr Undeb Ewropeaidd (Ymadael) 2018 ("Deddf 2018"). Mae paragraff 1(8) yn ymwneud â rheoliadau o dan Ran 1 o Atodlen 2 i Ddeddf 2018. Gwneir y Rheoliadau hyn o dan Atodlen 4 i Ddeddf 2018. Nid yw perthnasedd paragraff 1(8) o Atodlen 7 i Ddeddf 2018 i'r Rheoliadau hyn yn dod yn amlwg oni bai ei fod yn cael ei ddarllen ar y cyd â pharagraff 12 o Atodlen 7 i Ddeddf 2018. Byddai cyfeiriad at baragraff 12 o Atodlen 7 i Ddeddf 2018, mewn troednodyn neu fel arall, yn gwella hygyrchedd y gyfraith.

9. Rheol Sefydlog 21.3(ii) – ei fod o bwysigrwydd gwleidyddol neu gyfreithiol neu ei fod yn codi materion polisi cyhoeddus sy'n debyg o fod o ddiddordeb i'r Senedd.

Mae'r Memorandwm Esboniadol yn nodi'r canlynol o dan y pennawd 'Ymgynghoriad':

*Cyhoeddwyd cyfathrebiadau cychwynnol APHA ar GOV.UK ar 18 Awst 2022.
Cyhoeddwyd rhagor o wybodaeth ar 10 Mawrth 2023.*

A all Llywodraeth Cymru gadarnhau a fu ymgynghoriad ar y Rheoliadau hyn ai peidio.

Nid oeddem yn gallu dod o hyd i'r wybodaeth bellach dyddiedig 10 Mawrth 2023. Nid yw ddogfen gyfathrebu dyddiedig 18 Awst 2022 ar gael yn hawdd ar gov.uk, a byddai darparu lincs yn y Memorandwm Esboniadol o gymorth i'r darlennydd.

Ymateb Llywodraeth Cymru

Mae angen ymateb gan Lywodraeth Cymru i bwyntiau adrodd 1 i 5 a 7 i 9.

Trafodaeth y Pwyllgor

Trafododd y Pwyllgor yr offeryn yn ei gyfarfod ar 26 Mehefin 2023 ac mae'n cyflwyno adroddiad i'r Senedd yn unol â'r pwyntiau adrodd uchod.

